

當平心不問大小佛於是令阿難臨飯說僧
跋僧跋者衆僧飯皆悉平等

佛說梵摩難國王經

佛說孫多耶致經

吳月支優婆塞 支謙 譯

聞如是一時佛在舍衛國行在祇樹給孤獨
園除鐘甚衆佛爲說經時有梵志名孫多耶
致望見佛即住拄杖吐舌念曰吾日三浴噉

果飲水不受人施吾行勝沙門行子曹甘食
好衣溫襦訛賢非真不如吾道也佛知梵志
心之所存告諸沙門曰夫人爲行有二十一
惡不得美食好衣志在婬泆志在瞋恚志在
愚癡志在睡卧志在疑結謂無應儀志在貢
高志在憍慢志在嫉妬志在慳貪志在兇虐
無惻隱心志在虛僞內外相違志在不慙內
無愧心志在穢行不自羞鄙志在彼惡而不
自見志在泆言不歎貞良志在交詬讒成二
惡志在會鬪不釋兩諍志在無禮自可不謙

志在遂非不受賢諫志在不孝滅慈好逆志
好邪道供奉妖蠱家財虛竭令親困窮不覺
非常不歸三尊美食好衣從欲奢華以斯二
十一惡穢亂其心猶氎汗垢染之為色萬無
益一懷斯眾惡死入地獄餓鬼畜生其痛難
量沙門覩佛明戒棄故自新練情滅欲內外
清淨又如淨氎染即成色為眾所觀沙門覩
明行高智足天下供奉衣食殿舍受之無尤
施者福大進行禪定獲溝港頻來不還應儀
人亦聞之沙門雖未得道明佛經義執心端

正孝順經教弘慈育物潤逮群生恕己安彼
視怨若子見女人來待之以妹若覩窮苦當
念地獄餓鬼畜生願令群生身安意喜得逢
三寶垢除冥滅心淨見明還於本無永康無
極志行如斯美食好衣終始無罪群生本性
當八貪婬瞋恚愚癡嫉妬濁中之濁冥中之冥者
十一沙門心開受明癡垢都寂雖處穢世猶蓮華
居夫泥中泥不能汙華受施無罪夫懷三毒
十惡不除恣心從欲諂欺求潤不奉佛戒寧
吞熱鐵飲烱銅斯死須臾穢濁受施死入太

山飲銅食炭其年難計矣梵志前白佛言吾欲去浴有溪名好首夫入中浴者意之穢垢隨水流漂自聞父教言日三浴佛告梵志斯土多溪人入中浴可得獲度苦乎千浴之人可除身垢奈心垢何吾諸沙門斷求念空不願三界心垢寂滅以得淨道汝從何師受法水浴去心垢乎對曰吾父云爾佛言若父得道不對曰不也佛言吾道從心出心端志淨乃得道耳梵志長跪陳白吾向拄杖吐舌但爲狂愚耳今聞佛經心始醒寤猶冥中有燈

火始今有目矣乞爲沙門願佛哀納佛言若有親報之對曰無親佛言沙門來即成沙門已於樹下坐唯二十一事去諸欲念霍然無想即得應儀道起至佛所以頭面著佛足言今盲者得視狂病得愈佛言斯道佳耶汝道佳乎對曰衆道皆邪唯佛道正佛告諸沙門熟唯二十一事道可得矣諸沙門聞經歡喜作禮而退

佛說孫多耶致經